



YELOD TELDEGLULID

NÜM: 2

FEBUL 2015

Pads: 9 jü 16

O Volapükaf lens in vol lölik!

Bü yels plu 70 cıfal ettimik: *Albert Sleumer*, kel äbinom dokan Godava katulik, kultan e latinan, älautom yegedi dö “Yesus Kristus in kuraan slamanas”. Yeged at pinotükon ün 1940 in *Volapükagased pro Nedänapükans*. Demü koded nutimik yeged ot dönu panotükon in *Vög Volapüka*. Noe binon nitedik id attimo, abi binon sam Volapüka gudik, sagatik e pemeditöla.

Utans, kels no binons slopans slama, ab kels steifülons ad reidön tradutodi kuraani, suvo bo cedons buki at vobodi neplitik, bi in surats mödikün el *Allah* pleidülom dö vinditaduns okik, e tädom utanis, kels no vilons lekredön vödis legätana okik (sevabo: ela *Mohammed*), me pönods sevärikün. Ye mutons demön, das Larabänans digidons vödis muvemik, e zu jinos, das el *Allah* äsüikom se diatek vönik. Utans, kels fägons ad reidön kuraani Larabänapüko, bo tuvons fikulis, bi sets in buk at suvo neklülons. Kod atosa binon loveükam kuraana defädik, ibä ün tim et tonatasot Larabänik no igo älabon pünilis seimik lä konsonats. Seko suno äsevoy no plu sinifis kuratik vödas mödik. Zu jinos, das pük koraana no äbinon Larabänapük voik, ab migot dialega Larabänapükik in topäd zao nilü zifs: *Mekka* e *Medina* < e larameya, kel ettimo us äbinon kosädapük utanas, kels äfägons ad penön. Reidolsös dilis yegeda dö kuraan ko nited, e juitolsös gebi Volapüka ela *Albert Sleumer*!

* * *

Febul binon mul, dü kel piano senobs-la tufavi dö yelasäsun koldik in taledalaf nolüdik. Ye fredükölo flors balid ya süikons e givons obes speli dö florüp komöl.

Glidis ladöfik e sufädi dö säsun koldik

vipom oles redakan e cıfal:

YESUS KRISTUS IN KURAAAN SLAMANAS (DIL BALID)

fa prof. dok. *Albert Sleumer*, studadilekan plödü dün e cifal Volapükaneffa

Slamans plu teltumbalion* lifons su taled. Do ün degyel lätik, mu pato in Türkän, motev gretik se mascids bo ejenon, sodas in ‘Istanbul’ te foldil bal, ed in *Damascus* te kildil bal mascidas nog boso pavisitons fa mans,¹ do i “nenlekred” efaneton sogodis slamik mödikün, ga kuraan nog ai pareidon fa slopans susnumik “profetana”, e - palärnon nenbukio. Me dun lätiko pemäniotöl samo stud ti lölik “Godava” binädon, äsä at patidon bevü votiks samo in niver: *Azhar*, pefünöl in *Kairo* pro slopans valik di *Mohammed*.² Tumats anik kuraanitidas calöfiko pecälodölas jäfoms in leyalaspadäds vemo gretiks nen stuls e nen püpits nivera at ün yel: 988 fa kalifan: *El-Aziz* pefünöla. Tidal alik kobükom zü ok degtelatis tel jüä kilis studanas, e loreidom, mödadilo seadölo ko tidäbs oka su tapeds su glun, kapitis balatik kuraana, büedom dönuön laiduliko, jüs ats fimikons laidio ini mem.

Lü atos nog plän pluuneplu prodöfik kömon dö tikodagols in tops anik vemo nekleiliks profetana. In kuraan sevabo pats e jenöfots ömiks palüjonilons, kels defü pläneds patik blebonsöv nesuemoviks. Relabuk at zuo no binon fomäd balnatälik, ab binon konlet cödotas e plänedas ela *Mohammed*, kel ädikom onis zao ünü degyel bal penanes oka. Om it reto ya änemom löloti “kuraani”, sevabo: loreid, dasevädükam u lejon. Pas fovan ela *Mohammed: Abu Bekr* äjafom buki voik kuraana, kel pävotabevobon fa kalifan (= pladulan) kilid: *Othman*, e tüi 950 pos Kristus pädilädon ad surats ü kapits 114. Kapits at ye leno päleodükons bai tim daveda oksik; labons tiädis se aldelalif pädütölölis.

Ya pos degyels nemödik pos deadam ela *Mohammed* slopans oma iteilons okis ad sunitans e jiitans. Grups at labülons tefü kuraan pladi sümik, äsä zao katulans e protästans lekredik tefü bib. Slopans ela *sunna* (= veg, lüod) zepons asä lonöfiki i loveükami mudöfik vönädikün, e lecedons okis verätalekredanis in *islam* (= sufod, sevabo tefü vil Goda).

Jiitans güo ädeimons dili ze gretiki loveükama et, ed äflagons, asä slopans kalifana ya bü dasev valemik omik piasenöla: *Ali*, kel imatikom ko *Fátime*: daut ela *Mohammed*, das teiko se licinanef nemedik at profetana, pladulans oma pösomons. Ädeimons kludo “kalifanis”: *Abu Bekr*, *Oman* ed *Othman* asä negitikis. El *jia* (= palet, sevabo ela *Ali*) labon attimo slopanis oka patiküno bevü slamans Pär-säna. Pästeton za 1500 pos Kristus asä tatarel.

* nu, ün 2015, pos yels 75, plu telmilbalion

II:11:2015

Do nu tradutods mödikum kuraana dabinons, kelas ut fa *Friedrich Rückert* (pedabüköl fa *A. Müller, Frankfurt am Main 1888*) palecedon asä gudikün,³ kuraan blebon, igo pro pluamanum gretik kulivanas, buk labü snils vel u plu vel.⁴ Sekü kod at bo binos-la frutik ad plänedön naedilo pladi kinik kuraan, e ko at slamaneſ lölik, - ibä relabuk onik i binon lonädik as lonemabuk onik! - labülon tefü Sanal Godälik obas. Yels plu 600 ya ipasetikons sis moted Kristusa, büä el *Mohammed* lanöfiko jäfedik, si! suslanälik äsüikom, e sekü bit oka äblinädöm krite dämi levemik. Ven pämotom tü 571 prilul 20, kritaneſ ya idavobon pö konsils valemik ze mödiks Godaviko jüo in binäds balatik lejoni Yesusa: Kristus, ed imicödon taanis (riananis) ed i smalükumanis (nästoriyanis, monofüsitanis, monotelitanis) Godäla. In dil sulüdavesüdik Siyopa, in Mesopotän ed in Larabän krit, yud e rurel larabans äjokons ta ods. Rel lätik äbinon ettimo migot lugodikulta, stelikulta e zoroata sa retodas anik yuda e krita. Ven el *Mohammed* as tedan ädutevom felis Larabänik, äsludom ad finükön lugodikulti ko brul relik onik.

Fövat ofovon

بِسْمِ اللَّهِ الرَّحْمَنِ الرَّحِيمِ الْحَمْدُ لِلَّهِ رَبِّ الْعَالَمِينَ الرَّحْمَنُ الرَّحِيمُ مَا لَكَ يَوْمَ الدِّينِ

NOETS

1. Leigo äsä atos jenon in sünaſogs bäldik, samo in *Praha*, vomes spad pagebidüon po stöbs in pödaglun, ini kel ofs in mödöts no pato gretiks tü plekadel calöfik, sevabo tü fridel, kömofs. Fridel päbuükön fa *Mohammed* pla sudel kritik, bi ma lejon omik el *Adam* pejaſom ün fridel. Men balid at ya i ebinom-la ma om slamaneſ verätalekredik balid! Drens omik iblägükons-la kaabi (= kübädaston) in *Mekka*. Us i egetuvom-la eli *Eva* piperöl!
2. Pöpatribüts slamik balatik labons lödaspadädis kobädik in näibumots nivera. Tuvoy us Türkänanis, Süriyänanis, Mesopotänanis, elanis di *Mekka*, e Lindänanis näi Nolüda-, Lofüda- e Zänoda-Frikopans (se Südan). Klüluko plä “Godav” i süntag, spiköfav, tikav, matemat, ed i gitav, jenav, taledav, e v. patidons. Stud lölik dulon dü yels 17. Pos tüp yelas 11 xam büik paduinion. Tid binon glatik. Fräds pro käled studanas papelons se fünods relöfik, kels attimo prodons goldamakis 1 850 000 a yel.
3. Väloti kuraanasuratas in Deutänapük buk ela *H. Grimme (Paderborn 1923)* lofon.
4. Sümikos lonöfon tefü talmud yudanas, kela traduti niveraprofäſoran: *Dr. Nivard Schlögl* in *Wien* liedo estöpedom pos pub bukülas nemödik; fovikumo tefü vaästad parsiyanas, tefü deadaniregiſtar Lägüptänanas e tefü vedadabuks hindutanas.

Vöds anik in yeged löpik pegeböls (Lingl.; Deut.; IALA - üf difon)

balnatälik homogeneous; homogen; homogenee	monofüsitan Monophysite; Monophysit
buk labü snils vel book with 7 seals; Buch mit 7 Siegeln; libro con 7 sigillos	monotelitan Monothelite; Monothelet
däm harm; Schaden; detrimento	näibumot annex building; Anbau; edificio annexe
degtelat a dozen; ein Dutzend; dozena	nästoriyan Nestorian; Nestorianer; nestoriano
deimön to reject; verwerfen; condemnar	pecälodöl employed; angestellt; empleate
dikön to dictate; diktieren; dictar	pläned clarification; Erörterung; explication
dütülön to derive from; entleihen aus; prender de	prodöfik profitable; ergiebig; productive
fanetön to seize (fig.); erfassen; sasir	püpüt desk; Pult; pulpito
fomäd a construct; Gebilde; obra	rianan Arian; Arianer; ariano
getuvön to rediscover; wieder- finden; retrovar	rurel primeval religion; Urreli- gion; religion primitive
gitav jurisprudence; Jurispru- denz; jurisprudentia	samo for example; beispiels- weise; per exemplo
hindutan Hindu	Sanal Godälik the divine Re- deemer; der göttliche Heiland; Salvator divin
jiitans Shiites; Schiiten;	sogod section of the community; Gesellschaftskreis; section del societate
jüä (kony.) to; bis; usque a	stelikult star worship; Sternendienst; astrolatria
kaab Kaaba	sükön to emerge; zum Vorschein kommen; apparer
kobükön to bring together; zu- sammenbringen; assemblar	surat surah; Sure
kuraan Koran	suslanälik exuberant; über- schwänglich; enthusiastic
laraban Arab; Araber; arabe	talmud Talmud
lärnön nenbukio to learn by heart; auswendig lernen; ap- prender a memoria	tidal senior teacher; höherer Lehrer; inseniante superior
lecek shed; Stall; stabulo	tikodagol line of thought; Gedan- kengang; ordine de ideas
lejon teaching; Lehre; doctrina	vaästad Avesta
leyalaspadäd hall; Halle	vedad Veda
lödaspadäd living space; Wohn- raum; area de residentia	votabevobön to reshape; um- arbeiten; refunder
lonädik authoritative; maßgeb- lich; normative	zoroat Zoroastrianism; Lehre des Zoroaster; zoroastrismo
lonemabuk code of law; Gesetz- buch; codice	
loreidön to read aloud; vorlesen; leger alicue ad alicuno	
lūjonilön to refer to; hindeuten; referer se a	

PIONIRÄL (DIL TELID)

“The Pioneering Spirit” fa *Frank Roger*, ini Volapük petradutöl
fa *Hermann Philipps*

6

“No kanoy bedotön osi”, äsagof jiel *Dr. Veronica Magelhaes da Silva* pö gasedema-konfer. “Etuvobs su mun nafi fa mens pemeköli, kel fūmo äseaton us in glun lunüpo. Sevobs ga, das atos binon fomälod mu bisarik – semo tikamagot de filmot magälöfa nolavik pla sömitamapün vestigadunikama nolavik. Attimo no kanobs lofön pläni. Vestig pluik tefü naf e tuvöp ona oblinon-la nūnis anik, ye bo no okanobs-la jafädön teori süadiköl ad plänön dabini ona su mun.”

Klüliko äbejäfoy jenoti at veitöfiko in vol lölik. Kondötamods ätenikons de neud nolavik love nesuem jü satir zunülik.

Keblünot veütikün äkömon de Svedän, kö kevoban televida-broadöpa stümabik änotodom, das naf – sotefä äkanom fūmetön osi medü magods jünü pebroadöls – jinon binön naf vikenik dientifü ets, kels ituvoy in mels nolüdik. Nilud at päfümükon dub leigod vifik fa kevobans nolavik desinoda.

7

Klülikos, das naföm jenöfo binon vikenanaf, ud alo sümädot nendöfik e kuratik jü pats pülikün ona. Ägeboy dunamodis distöfik ad fūmülön däti, e seks valik jonons, das naf fūmo pistukon dü vikenatimäd. Sevans Svedänik e Norgänik dasevons legi nafa.

Notükan desinoda sion, das no ekanoy tuvön pläni: “Labobs tikamagoti nonik, lio vikenanaf at ärivon muni. Ön mod nonik vikens äkanons lüvön tali ün datimäd et, ye klülabiko äplöpons. Atos binon löliko nenolavik e levemiko brulälüköl.”

Gaseds nolaviko läs klienöls lofons teoris mu bisarikis dö medam plödütaledik – pro kels klüliko jonäds seimik defons löliko. Jinos, das atos ye leno neleton lugasedis ad igo pluükön plänädis onsik dö din at.

Medäds fefikum valemo baicedons, das dinäd at binon dinäd pemiagöl fa stütedans desinoda, do atos no plänon, lio naf päblinon lü mun. Stütedans sunädo änoons kusadis at as “löliko smilöfikis”.

Bal onas igo äläükon: “If labobsöv skilis kaenik e finenamedis saidik ad vobädön duni so gianiki, fūmo äbemastikobsöv letodi at. Liedo atos binon plödü fägs obsik.”

Vüo taledo kompenäts ömik iprimons büsidaprimäti vikenatifik, kel vemo benoplöpon. Cil nonik vilon palogön nen vikenajitül, pledadina-vikenanaf, e soms. Pöped vikenas neföro äbinon so vemik.

8

Dü televida-spikot nola-
van Norgänik äsagom,
das fe no labom pläni
tefū dabin nafa su muna-
glun, ab das vipom ad
küpälükön obis tefū süm
nitedik. “Givüloy letüvi
Meropa ele *Columbus*,
ye jonäds dabinons, das
vikens ya inafons love
Latlantean büikumo mö



tumyels. Sümiko cedoy kösömiko eli *Neil Armstrong* mani balid,
kel föro ebestepom muni, ab nu klülikos, das vikens äbinons us
bü om mö tumyels. Vo cedob, das sötöy dönu meditön jenotemi
me lecedamod at. Vikens digädons lobüli demü atos, keli ädui-
nons. Kin sevon-li, kiöpo äbinons zu? Tefū pioniräl onas vo nos
leigodovik dabinon in jenotem menefa.”

* * * * *

9

Munäd mekavik: *Ares Rising* (“mard löpiköl”), kel siron zü
mard, esumodon magodis disredik, kels jonons fomis bisarik dis
süfät marda. Voläd lölik speton mu pejänälo sekis vestiga otas.
Spetät vemo pluikon – mu pato in Skandinän.



II:15:2015

Vöds anik in konot löpik pegeböls (Lingl.; Deut.; /ALA - üf difon)

brulälüköl confusing; verwirrend; consternante

büsidaprimät business initiative; Vermarktungsinitiative;
initiativa de commercialization

datimäd epoch; Epoche; epocha

filmot movie; Film; pellicula

ga of course; doch ja; naturalmente

jonäd indication; Hinweis; indizio

keblünöt contribution; Beitrag

lecedamod perspective; Betrachtungsweise; modo de considerar

lugaseds tabloids; Sensationspresse; pressa sensationalista

magälöf nolavik science fiction

medam intervention; Eingriff

pemiagöl feigned; fingiert; fingite

plänädön to interpret, deuten; interpretar

plödütalik alien; außerirdisch; extraterrestre

pöped popularity; Beliebtheit; popularitate

siön to concede; einräumen; conceder

stütedan sponsor; Unterstützer (mit Geld, usw.);
subventionator

süm analogy; Analogie; analogia

taledo on Earth; auf der Erde; super le terra

vestigadunikam research activity; Forschungstätigkeit;
activitate exploratori

viken Viking; Wikinger

zunülik biting (fig.); bissig; mordace

~~~~~  
**Koräkots tefü dil balid konota at in gased yanula:**

| <i>su pad: 5</i>                                               | <i>bagaf, kedet</i> |
|----------------------------------------------------------------|---------------------|
| sirkon muni → sirkon zü mun                                    | 1, 2                |
| vestigians peblümons nedöfiko<br>→ vestigians blümons nedöfiko | 2, 4                |

~~~~~  
EKÖ! TUVEDOT RÄTA DÖ GLÖK BÜGOLÖL SU PAD: 16

Düp binadon me sekuns 3600. Glök bügölöl lennon sekuns 3600 sa
40 unu düp verätik. Kludo propor düpa verätik ta düp glöka bügölöl
binon 3600 : 3640. Düps 24 binadons me sekuns 86400. Kludo ünü
düps 24 ma glök bügölöl te sekuns verätik: $(86400 \cdot 3600) / 3640 \approx$
85451 epasekons.
Atos binons za minuts 1424 ü za düps teldegkil sa minuts foldegfol.
Kludo tim verätik binon düp: tel minuts foldlifol poszedelo, ven glök
bügölöl lennon düp kilid poszedelo.

II:16:2015

TUVEDOT RÄTA DÖ KADS KÖLIK KIL IN GASED BÜIK

Hiel Tom ätikom: “Jiel Catherine labof len bäk oka kadi blövik, klu kad len bäk oba kanon-la u blövön u redön. Gudiküno sagob nosi.”

Jiel Catherine ätikof: “Hiel Tom no sagom seimikosi. Atos sinifon, das kad len bäk oba no redon, bi voto sevomöv, das kad len bäk oma muton blövön. Kludo köl kada len bäk oba blövon.”

Ekö! ägetof premi!

? ?

RÄT DÖ GLOK BÜGOLÖL

Glok semik bürgeron mö sekuns teldeg ünü düpalaf. Üf glok jonon timi verätik tü düp kilid poszedelo, düp kinid verätik obinos-li, ven glok at jonon düpi kilid poszedelo tü del sököl? Kalkulolsös ziliko!

Tuvedot binon su pad: 15 gaseda at.



VOLAPÜK - PÜK CALÖFIK IN WENSLEYDALE

El *Republic of Wensleydale* binon smalanet in Nolüda-Linglän fa bluks vemik: *Ure e Bishopsdale Beck*< paduflumöl. Nem länoda at sinifon eli “fälid yebaläna ela *Wodan*” (cifagod germanas). Repüblük taon ta bolit Regäna Pebalöl.



Ma hiel *Robert Garside*: presidan repüblüka at< Volapük binon bal pükas calöfik in smalanet omik. Presidan e ministoranef omik desirons ad labön kosädi vemöfikum ko Volapükane, e desinons ad plu jäfön in kobäd Volapükanas.

Ladöfikio glidobs elanis di *Wensleydale* e spelobs, das ziliko olärnons valemapiük: Volapük. Net onas obenikös! http://mw.micronation.org/wiki/Republic_of_Wensleydale

